



**PRIJEDLOG**

Broj: 01/1-02-711/14  
Ilijaš, 28. 03. 2014. godine

**ZAPISNIK**

sa 17. (sedamnaeste) sjednice Općinskog vijeća Ilijaš održane dana 27. 03. 2014. godine, sa početkom u 10h.

Sedamnaestom sjednicom OV-a Ilijaš je predsjedavao predsjedavajući OV-a g-din Damir Filipović.

<b>RB.</b>	<b>IME I PREZIME</b>
<b>SDA</b>	
1	MAHIR DEVIĆ
2	NEDIM MATORUGA
3	SAUDIN DURMIĆ
4	HALID DIZDAREVIĆ
5	AMAR DOVADŽIJA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
<b>SDP</b>	
10	ALAN ŠERAK
11	MARIONETA ILIĆ-JURETA
12	DAMIR FILIPOVIĆ
13	SELVER HERIĆ
<b>SBB</b>	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
<b>SAMOSTALNI VIJEĆNICI</b>	
18	EDHEM HASANOVIĆ
19	ASIM MUJIĆ
<b>STRANKA ZA SREDNJE</b>	
20	BESIM GLJIVA
21	AIDA MALIŠEVIĆ
<b>LDS</b>	
22	NIJAZ RASTODER
23	NIHAD BUČUK

	<b>BPS</b>
24	MUHAMED HANDŽIĆ
	<b>SAMOSTALNI VIJEĆNIK</b>
25	DIZDAREVIĆ ENES

Prisutni gosti:

1. Nermina Durić-Kahvedžić - Radio Ilijaš
2. RTV Vogošća
3. Šemso Jusić – predsjednik Savjeta MZ Podlugovi
4. Mehmed Smajlović – predsjednik Savjeta MZ Mrakovo
5. Benis Fazlić – direktor JU KSC i Radio Ilijaš
6. Almira Ćosić – volonter
7. Nermina Smajić – volonter
8. Hamdo Džanko – predstavnik građana MZ Podlugovi

Ostali prisutni:

1. Akif Fazlić – općinski načelnik
2. Merima Osmanović – pomoćnik načelnika
3. Sanja Zagorac-Jozić – pomoćnik načelnika
4. Alma Imamović – pomoćnik načelnika
5. Sadeta Brkić – pomoćnik načelnika
6. Meliha Avdibegović – pomoćnik načelnika
7. Ilda Kahriman – sekretar OV-a
8. Adha Masnopita – stručni saradnik u Službi za društvene djelatnosti
9. Aida Čutura-Marić – stručni suradnik u Stručnoj službi OV-a i općinskog načelnika
10. Sadik Alić – komunalni inspektor
11. Maida Habibović – zapisničar.

Predsjedavajući je otvorio sjednicu i konstatovao da postoji kvorum za odlučivanje.

Zatim je dao na razmatranje zapisnik sa 16.sjednice OV-a.

Primjedbi na zapisnik nije bilo, pa je OV-a jednoglasno usvojilo zapisnik sa 16. sjednice OV-a.

Prije razmatranja predloženog dnevnog reda predsjedavajući je pročitao pismo, akt vezano za Organizaciju 1.Mart, gdje traže od općinskog načelnika i općinskog vijeća da daju svoju saglasnost po pitanju podrške u finansijskom smislu.

Zatim je pročitao i dao na razmatranje predloženi dnevni red.

Primjedbi i prijedloga na dnevni red više nije bilo, pa je OV-e jednoglasno usvojilo slijedeći

#### **DNEVNI RED**

1. Vijećnička pitanja i inicijative
2. Izvještaj o realizaciji zaključka sa 16 sjednice OV-a

3. Izvještaj o izvršenju Budžeta općine Ilijaš za period 01.01.-31.12.2013.godine
4. Izvještaj o radu i finansijskom poslovanju za 2013.godinu Javne ustanove "Kulturno-sportski centar i Radio Ilijaš" za 2014.godinu
5. Prijedlog Odluke o davanju saglasnosti na Plan rada Javne ustanove "Kulturno-sportski centar i Radio Ilijaš" za 2014.godinu
6. Prijedlog Odluke o provedbi Programa mjera i ušteda sa socijalnim programom za 2014.godinu, a shodno Odluci Općinskog vijeća Ilijaš o davanju saglasnosti na Program mjera i ušteda sa socijalni programom broj:01/1-02-511-5/14 od 27.02. 2014.godine
7. Prijedlog Odluke o ustupanju prava korištenja nad zemljištem Udruženju Sportska akademija Ilijaš u svrhu izgradnje malonogometnog igrališta sa umjetnom travom
8. Prijedlog Odluke o usvajanju "Plana upravljanja čvrstim otpadom za područje općine Ilijaš za period 2014-2019.godine"
9. Prijedlog Odluke o prestanku statusa nepokretnosti u općoj upotrebi (K.O. SP\_Podgora)
10. Prijedlog Odluke o prestanku statusa nepokretnosti u općoj upotrebi (K.O. SP\_Donja Vogošća i K.O. SP\_Ljubnići)
11. Nacrt Odluke o privremenom korišćenju javnih površina na području općine Ilijaš
12. Prijedlog Kodeksa Etike izabranih zvaničnika općine Ilijaš
13. Izvještaj o radu Pravobranilaštva Kantona Sarajevo za općinu Ilijaš za 2013.godinu

#### AD-1

#### Vijećnička pitanja i inicijative

#### AIDA MALIŠEVIĆ – Vijećnica Stranke za Srednje

##### Inicijativa:

1. Pokrećem inicijativu da se "podhitno" riješe zemljišne knjige i razmotri početak procesa izlaganja podataka na javni uvid, poljoprivrednici, i ne mogu da ostvare federalni poticaj, a poznato nam je da većina stanovništva gornjeg kraja od toga živi.

##### Pitanje:

2. Imam informaciju da su ovih dana neki platenici podijeljeni pa građane zanima koje donirao platenike i kome su dodijeljeni?

#### AKIF BEŠLIJA – Vijećnik SBB BIH ILIJAŠ

##### Inicijativa:

1. Pokrećem inicijativu prema organu uprave i prema nadležnoj općinskoj službi da izađe na teren u MZ Mrakovo naselje Pavlovići kod igrališta da utvrdi činjenično stanje na privatnom posjedu, gdje je formirana divlja deponija smeća od N.N lica.

Obrazloženje: Na pomenutoj lokaciji je formirana divlja deponija, a ista je blizu naseljenog mjesta i izvora pitke vode koju koristi stanovništvo i stoka, te je moguće da dođe do određenih zaraznih oboljenja stanovništva i stoke.

## ADEM EFENDIĆ – Vijećnik SBB BIH ILIJAŠ

### Pitanje:

1. Tražim od nadležne općinske službe da dostavi OV-Ilijaš potpunu informaciju o realizaciji projekta "Obezbeđenje prihoda za siromašne porodice iz općine Ilijaš kroz uzgoj povrća u plastenicima". Molim da mi u odgovoru navedete kojim korisnicima ( ime i prezime, te adresu ), kojom procedurom i po kojim kriterijima je vršen odabir lica za dodjelu plastenika?

Obrazloženje: Nedovoljna obaviještenost građana općine Ilijaš, a koji su zainteresovani za ovakve projekte, te kako bi mogli u budućim sličnim projektima učestvovati i aplicirati, kako bi mogli biti konkurenti većem broju proizvođača.

### Inicijativa:

1. Da općinski načelnik i općinska nadležna služba do slijedeće sjednice OV-a pripreme prijedlog Odluke o ustupanju i dodjeli poljoprivrednog zemljišta na području općine Ilijaš fizičkim i pravnim licima sa područja općine Ilijaš.

Obrazloženje: Poznato je da na području općine Ilijaš postoje znatne površine poljoprivrednog zemljišta u vlasništvu javnog dobra koje se koristi od strane fizičkih i pravnih lica u nedovoljnoj mjeri i netransparentno. Potrebno je da se iznađe sistemsko rješenje sa jasnim uslovima i kriterijima koje će OV-e Ilijaš usvojiti, a nadležni općinski organ javno i transparentno implementirati.

2. Pokrećem inicijativu, koja je bila upućena Kolegiju Općinskog vijeća, od strane građana Podlugova, tačnije naselja Ina-Makljen, za izgradnju i upotrebu autobusnog stajališta na potezu prelaza od benziske pumpe Merol do skretanja za Brezu, te bih zamolio predsjedavajućeg vijeća da dozvoli predstavniku građana koji je poslan sa zbora građana da tu inicijativu iznese.

Predstavnik građana MZ Podlugovi Hamdo Džanko je pročitao zahtjev građana MZ Podlugovi da se pokrene otvaranje autobusnog stajališta, a koji je u prilogu.

## FAHIR HASANOVIĆ – Vijećnik SDA

### Inicijativa:

1. Građani su izrazili zahtjev za registraciju linije Sarajevo-Dragoradi koja je nekad prije postojala i uvođenje linije subotom, te da se to proslijedi nekoj od firmi koje to rade.
2. Inicijativa prema JKP "Vodostan" Ilijaš. Na području MZ Dragoradi, građani nisu zadovoljni čišćenjem i hlorisanjem bazena vodovoda koji održava Vodostan.
3. Ponovo potenciram zahtjev, a to je odvoz smeća, da se to uredi na MZ Dragoradi. Sve MZ imaju organizovan odvoz smeća, a MZ Dragoradi to nema, te se nadam da će to u skorije vrijeme biti realizovano.
4. Inicijativa upućena nadležnoj općinskoj službi, da se navedu sve relacije puteva koje su građene uz učešće građana.
5. Inicijativa koja je već pokrenuta, a to je da se stanje zemljišnih knjiga dovede u red.

Pitanje:

1. Zašto Načelnik Općine Ilijaš dozvoljava bespravnu gradnju čvrstih objekata u centru Ilijaša i uz to narušava Regulacioni plan grada, uništavajući zelene površine ionako osiromašenih ilijaških parkova?

Obrazloženje: Građani Ilijaša su svjedoci bahatog ponašanja pojedinih privrednika u Ilijašu, koji su u sprezi sa predstavnicima općinskih službi i djelom zakonodavne vlasti privilegovani do te mjere da bukvalno rade šta hoće. Naime, kao što vidite u prilogu koji vam dostavljam, neki od njih su izgradili čvrste-betonske objekte na površini koja je predviđena za parkovske sadržaje (cvijeće, drveće, i dr.) i time još jednom pokazali građanima Ilijaša svu svoju moć. Svima u ovom Ilijašu je jasno da iza ovakvih pojava stoji neko iz izvršne i zakonodavne vlasti, a najpozvaniji su načelnik općine Ilijaš i predstavnici većine u općinskom vijeću. S tim u vezi, zahtijevam da nam se na ovo pitanje za slijedeću sjednicu pripremi adekvatan i nedvosmislen odgovor, te da se u tom odgovoru nađu i mjere koje su poduzete prema počiniocima narušavanja regulacionog plana grada Ilijaš i mjere prema službenicima koji su dali saglasnost na isto.

MARIONETA ILIĆ-JURETA – Vijećnica SDP-a

Pitanje:

1. Hoće li ove godine biti podijeljena sjemena socijalno ugroženom stanovništvu i osobama sa biroa i kad? Molim da mi se odgovori na ovoj sjednici.
2. Prošlu sjednicu sam podnijela inicijativu vezanu za autobuska stajališta, a nisam dobila odgovor, također molim da mi se odgovori na ovoj sjednici.

Inicijativa:

1. Na jednoj od prethodnih sjednica sam podnijela inicijativu da se izdvoje određena sredstva za džamiju u Solakovićima, za izgradnju ograde i još neke radove u unutrašnjosti, nekih 5000 KM, nisam dobila nikad odgovor na to, pa me interesuje da li možemo dobiti ta sredstva ili ne, s obzirom da je cijelu izgradnju finansiralo lokalno stanovništvo i donatori, da znamo na čemu smo.
2. Da pozovemo predstavnike i direktora Šumarstva na slijedeću sjednicu i dogovorimo na koji način uspostaviti red u održavanju puteva nakon sječe i odvoza šume. Na prošloj sjednici je gospodin Akif Bešlija podnio inicijativu vezano za isto, a nije mu odgovoreno, a postoje indicije da će lokalno stanovništvo blokirati put koji nije doveden u prvobitno stanje nakon odvoza šume.
3. Da firma JKP "Vodostan" izađe na teren i ispita mogućnost pravljenja rezervoara za vodu za naselje Povoča u kojem bi učestvovali i mještani, a koji godinama imaju probleme sa vodom.
4. Da se ispita ko je bio zadužen za krpljenje asfalta u MZ Ljubina prema Solakovićima i Ulištovićima, jer je isti prodavao asfalt na kamionu iako posao nije završen ni upola, želim da stanemo na kraj kriminalu i korupciji, i da svako odgovara za svoje postupke.
5. Nadopunjujem se na inicijativu gospodina Handžića, gdje smo dobili jutros pismo stanara Banovca. Ja sam glasala za ovaj prijedlog, da se proširi ovaj objekat i zaposli još neka osoba, ali je moj glas zloupotrebljen, napravilo se betonsko ruglo. Pitanje za vijećnike, ko je dozvolio Šehić Enveru da napravi onakvo ruglo u naselju Banovac? Prije svega, zar nije trebalo tražiti suglasnost stanara zgrade na koju je

dozidan objekat? Znači li to da svi stanari uz blagoslov općinskih moćnika mogu dozidati šta hoće na nečijoj zgradi ili kući? Uz to gospodin Šehić Enver je uništio zelenu površinu, koju nije kupio, i "sasuo" na nju gomilu betona da bi proširio kafanu. Gospodo vijećnici sramotno je to što radimo i kako izigravamo povjerenje koje su nam dali građani. Da li ste uopšte razmišljali kad ste dali suglasnost za ovako nešto? Postoji li ovaj objekat u Urbanističkom planu Ilijaša? Je li ovo možda priprema za još nekog ko ima poslovni prostor da u skorije vrijeme napravi nešto slično? Odakle vam ovlaštenje da presijecete cestu-prilaz zgradi, da suzite ionako uzak prolaz na tom mjestu na Banovcu? Vi ste učinili uslugu jednom čovjeku, a ugrozili ste na stotine stanara Banovca. Najveći broj djece ide tim putem u školu, je li vam vrijednija kafana od sigurnosti i života djece? Koliko kod vas košta jedan život, ali naravno da nije od nekog zvučnog imena i prezimena? Uostalom, zar nije Zakonom zabranjena prodaja alkohola i cigareta u krugu od 50 m oko škole? Mi u tom krugu imamo dvije škole, džamiju i četiri kafića i to je malo, treba još proširiti. Sramota!!! U večernjim satima na tom dijelu Banovca su parkirani sve jedan do drugog automobili, tako da ako se nedaj bože nešto desi ne mogu proći ni pješaci, a kamoli hitna ili vatrogasna kola. Zahtjevamo da se hitno reaguje na ovaj problem u protivnom će stanari okolnih zgrada ( 126.Ilijaške brigade br.96, 98, 100 i 102.) jer su najugroženiji, svoja prava tražiti na protestima, a i na višim nivoima vlasti, a to svakako nikome nije u interesu.

Željela bih da se vijećnici izjasne u vidu zaključka.

ENES DIZDAREVIĆ – samostalni vijećnik

Inicijativa:

1. Na inicijativu građana Podružnice Stari Ilijaš, pokrećem inicijativu za izgradnju pješačke staze tj. trotoara od Malešićkog mosta do raskrsnice za Luku. Planirano je da se Osnovna škola u Starom Ilijašu otvori u narednoj školskoj godini 2014/2015., a ne postoji pješačka staza tj. trotoar pored regionalnog puta Sarajevo-Ilijaš. Na ovoj dionici je velika frekvencija vozila, a pješaci se moraju kretati jednim dijelom po regionalnom putu, što dovodi u opasnost život pješaka i učesnika u saobraćaju. Uvidom u budžetske stavke Općine Ilijaš nisu planirana sredstva kao i Kantonalna direkcije za puteve, a u vezi navedene dionice. Tražim od općinskog načelnika i nadležne službe da se izjasne o planiranim aktivnostima na pomenutoj dionici.

NIJAZ RASTODER – vijećnik LDS-a

Izvinjavam se što sam glasao za neke projekte ovdje u gradu i obećavam da više neću glasati nikada za nešto što se prodaje, a regulisano je Regulacionim planom Centar i Banovac.

Inicijativa:

1. Pokrećem inicijativu da se uredi staza za pješake od KSC-a do JU OŠ "Hašim Spahić".

SEAD ŠEHIĆ – vijećnik SBB

Pitanje:

1. Ponovo pokrećem pitanje nadležnoj općinskoj službi da mi se dostave imena

pravnog lica i osoba, koja su učestvovala u predmetu u Starom Ilijašu, gdje je došlo do nelegalnog pregrađivanja puta i zatrpavanja kanala za odvod površinskih voda. Da podsjetim, put je pregrađen od strane Asima Brahovića kome je put nelegalno prodat i dato mu je rješenje koje je općina uvidjevši grešku poništila. Ponovo navodim da je tu došlo do povrede zakonitosti u upravnom postupku, nesavjesnog rada u službi, te elemenata prevare.

NIJAZ MAŠIĆ- Vijećnik SBB-a

Prije mjesec dana, u 7 sati i 30 minuta, u kafiću "Vip" učenicima je točen alkohol, što je za posljedicu imalo strahovitu tuču, u kojoj je više učenika povrijeđeno.

Inicijativa:

1. Pokrećem inicijativu da nadležne inspekcije obiđu ugostiteljske objekte u okolini škola i provjere toči li se alkohol.

SELVER HERIĆ-Vijećnik SDP-a

Imam pitanje u vezi s dežurstvom, odnosno drugom smjenom u ambulanti u Srednjem. Zar na tematskoj sjednici nije bila predviđena realizacija ovih zaključaka? Nema smisla više ni da dogovaramo tematske sjednice, ako ono, što usaglasimo, ne realizujemo. Ono što danas moram prokomentarisati jesu moje inicijative s prethodne sjednice. Moje inicijative odnosile su se na rad, odnosno nerad "Vodostana", te O.Š. u Srednjem. Ne znam na koji način se stekao utisak da neko treba samnom da se dopisuje. Direktor Vodostana, očigledno, u svom inspirativnom pismu želi nekoga da spomene, ali ne smije.

Preporučujem mu da ode u matičnu stranku i da se preispita. Vijećnici SDP-a ne učestvuju u kampanji njegovog rušenja. U svom dugometražnom pismu, ništa nije rekao, ali je zato pokazao sve ono što ne priliči jednom menadžeru. U vezi s naplaćivanjem usluga, koje sam spomenuo prošli put, direktor je rekao da ih je naplaćivala mjesna zajednica, a ja, druže direktore, tvrdim da to nije radila mjesna zajednica, nego radnik "Vodostana", i to po cijeni od 1.200 konvertibilnih maraka. Izađite iz kancelarije, idite na teren i pitajte stanovnike kome su dali novac za usluge "Vodostana". Što se tiče zapošljavanja po rodbinskim vezama, na koje sam ukazao direktoru "Vodostana", nisam dobio apsolutno nikakav odgovor. A ne bi bilo loše, direktore, da spomenete da ste u određenom periodu zapošljavali svog šuru, po zanimanju tesara, koji je penzionisan. O tome ste, direktore, trebali da pišete.

Sada bih se obratio direktoru škole u Srednjem. Dragi direktore, neprimjereno je da Vi meni, autohtonom stanovniku tog područja, pričate historiju te škole. Ja nisam govorio o neradu nastavnika, naprotiv, ti nastavnici su ogledalo okolnim školama, to su radnici za primjer. Ako se ne varam, ja sam se direktore obratio, lično Vama, koji se nije udostojio da mi odgovori ni na jedno pitanje.

BESIM GLJIVA- Vijećnik Stranke za Srednje.

Inicijativa:

1. Stanovnici šireg područja Gajeva i Dragorada traže od nadležnih u BH Telecomu, da im, putem postojećih predajnika Gudelj, Lokva i Spahin Han, omoguće pristup Internet mreži, konkretno tzv. "Moja tv" mreži.

Što se tiče škole u Srednjem, lično ću poslati dopis, kojim ću zatražiti da nam se dostavi

struktura uposlenih, pravne osnove za funkcionisanje, i ostale neophodne informacije, koje su i građani tražili.

Prijedlog zaključka:

Radi se o sječi šume na gornjem kraju. Pokušaću na jedan kolegijalan način da ukažem na stanje kakvo jeste, i vi to dobro svi znate. Šume na gornjem kraju nema. Ovaj zaključak vi preformulišite kako želite, ali da bar za početak menadžmentu "Sarajevo-šuma" naložimo, ili da na neki način menadžment uslovi kupce drvnih sortimenata da ne vrše izvoz balvana kamionima sa prikolicama, teškim kamionima koji vjerujte prelaze i po 50 tona, to odgovorno tvrdim, bar na dijelovima puta koji idu od Gajeva prema Dragoradima, Vrucima, Vukasovićima i Gornjim Čevljanovićima. Također, tražim da se preispita plan sječe šume, odgovorno tvrdim, pa neka me i tuže, da je plan sječe šume "isfriziran", da se šuma legalno krade, ne postoji federalni zakon o šumama, radi se na osnovu neke famozne kantonalne uredbe, nemamo reznih jedinica, njih smo zatvorili, 63 su postojale koje su bile nelegalne, ali smo ih uspjeli zatvorili, međutim, šume nestaje sve više, od područja Čevljanovića, do granice entiteta je nema nikako. Ako "Sarajevo-šume" nemaju mogućnost, ako neko na njih vrši pritisak, da nam pomognu barem na način da sačuvamo puteve, a neko će odgovorati za te šume, da se zaustave ti teški kamioni, da se preispita taj plan sječe, taj famozni "etat". Da pokušamo iznaći mogućnost da se u narednih barem 10 godina, zabrani sječa šume na ovom području, kako bi se ostvario kakav takav prirast. Tražiću, dakle, da se po ovom zaključku izjasnite.

Zamjenik predsjedavajućeg Mahir Dević preuzima vođenje sjednice.

DAMIR FILIPOVIĆ – Vijećnik SDP-a

Koristim ovu priliku prije svega da se osvrnem na pitanje koje sam postavio prije po pitanju izmjene regulacionog plana Banovac. Ja sam svjestan da su to sredstva kojih općina nema, ali kako se izvršila korekcija ovog dijela Ilijaša, kako se izvršilo premještanje pijace može da se izvrši korekcija regulacionog plana Banovac, da se napravi parking prostor, a ne da čekamo investitore da se smiluju da naprave i omoguće ljudima da imaju normalne uvjete za život. U odgovoru stoji da to nije regulisano regulacionim planom. Nije regulisano mnogo šta regulacionim planom pa postoji i izgrađeno je, tako da i sad treba da se osvrnemo na ovo u ime svih građana na Banovcu.

Dobio sam Strateška pitanja od gospodina Mulić Rafeta, u ime građana demobilisanih boraca, te ih postavljam:

Pitanja:

1. Organizovati OV-e Ilijaš što prije, tj. napraviti tematsku sjednicu "rad-nerad svih ratnih udruženja". Po nekim zvaničnim podacima do sada je općina poklonila preko 1.500.000,00 KM, a od toga je korist imalo njih nekoliko. Nama je poznato da su oni u službi politika ali to je i sramno, doveli su nas do toga da smo obespravljeni i poniženi, te nas ismijavaju svi neborci pa nekada i članovi naših porodica.
2. Obezbjediti demobilisanim borcima mogućnost da zarade u Ilijašu za opstanak porodice npr. parking početi naplaćivati, pijacu dati na upravljanje našim kategorijama i sl.
3. Obezbjediti preko "javnih radova" upošljavanje boračkih kategorija sa područja općine Ilijaš.
4. Subvencionirati nezaposlene demobilisane borce, plaćanje troškova vode, električne enegrije i ostalih komunalija, pa tražimo od Vijeća da stavi van snage sve



tužbe koje se odnose na pripadnike boračke populacije tj. nezaposlene borce koji nemaju nikakvih primanja, kako se ne bi samoorganizovali kroz proteste.

AKIF FAZLIĆ – Načelnik

Koristim ovu priliku da se osvrnem na nekoliko važnih pitanja koja su danas pokrenuta. Prije svega pokrenuto je pitanje izgradnje autobusnog stajališta u Podlugovima. Znamo da je to već odavno bitno saobraćajno rješenje za Podlugove, međutim, sa aspekta tehničkih standarda autobusko stajalište se ovdje teško može locirati. Nudim MZ rješenje, ako MZ može riješiti imovinske odnose, mi ćemo u ovoj godini napraviti stanice i rekonstruisati onaj dio ceste između dvije rampe, i to bi bilo nešto najefikasnije. Ako se ne mogu riješiti imovinski odnosi, mi smo donijeli budžet, u budžetu nije planirala nabavka zemljišta za ovu vrstu potreba, proglašenje javnog interesa i sva ta procedura trebaće sigurno godina dana i više kako bi se ovim budžetom mogla planirati nabavka zemljišta. Direkcija za ceste daće svoj prijedlog kroz projekat, gdje se oni mogu locirati. Mi očekujemo stav MZ po ovom mom prijedlogu. Što se tiče podjele sjemena, mi smo kao općina i budžet svojom odlukom o podsticajima uvijek vodili politiku stimuliranja. I kroz tu odluku, i tu politiku nije bilo podjele sjemena, uvijek se stimulira ostvarena proizvodnja, i u aprilu mjesecu po programu vijeća doći će odluka o poticajima. U prošloj godini ona je iznosila oko 223 hiljade. Mi smo do sad isplatili oko 180 hiljada i imamo još oko 50-tak hiljada obaveza prema našim poljoprivrednim proizvođačima. Eventualno, ako se javi neki donator za podjelu sjemena, to je druga priča i onda će se tu izvršiti raspodjela, kao što se pojavio donator za raspodjelu plastenika, ali mi ćemo dati jedan cjelovit odgovor za slijedeće vijeće. Pitanje autobuskih nadstrešnica nije ni u budžetu ni u operativnom planu za 2014. godinu pozicionirano, te na tu temu nemam šta pričati. Pitanje izdvajanja za vjerske objekte, znate da smo mi u budžetu sa 82 hiljade u 2013.godini, smanjili na 35 hiljada u 2014.godini, cijeneći da su neki projekti u prošloj godini već završeni. U nekoj raspodjeli sredstva koji još nismo utvrdili vidjećemo da li će ostati još nekog prostora i za džamiju Solakovići. Pitanje bazena koji bi bio izgrađen, odmah možemo reći, da kroz ove male projekte u budžetu koje nismo definisali za šta je to, da napravimo jednu inicijativu i ako je ovo rješenje da idemo na izgradnju bazena. Što je spominjao gospodin Dizdarević, trotoar Stari Ilijaš – Malešići, vi ste dobili na prošloj sjednici od Direkcije za ceste operativni plan koji je postao i naš sastavni dio operativnog plana, i u tom operativnom planu su naglašene tri pozicije. Jedna je konačno završetak rekonstrukcije ulice od crkve do skretanja za Bioču, i to je što se tiče regionalne ceste. I tu su još dva projekta, jedan je za završetak puta u Bioči i 100 hiljada za gradsku saobraćajnu infrastrukturu. Naravno, ako bi ovo mogli riješiti za autobuska stajališta, onda bi vidjeli od Direkcija za ceste da to probamo u ovoj godini riješiti. Ja se zahvaljujem Nijazu Rastoderu na ovom prijedlogu, za ovu pješačku stazu škola-KSC, ona će ući kroz ovaj projekat Direkcije za ceste od 100 hiljada. Pitanje plastenika, pitanje izgradnje fontane ćemo odgovoriti za slijedeću sjednicu, a kada je pitanje prijedlog zaključka Besima Gljive, ja to podržavam, ali bi to trebala biti dva zaključka. Jedan je koji bi išao prema Sarajevo šumama, da li problem saobraćaja riješiti kroz zaključak koji je Besim iznio, to je Sarajevo šumama lakše, ili ih obavezati da naprave međustovarište na Gajevima odakle bi kretao taj generalni transport trupaca, gdje bi dolazili kupci, ali to neka ostane Sarajevo putevima da se izjasne o vrsti rješenja. Drugi zaključak bi išao prema Kantonalnoj upravi za šume da preispita plan sječe šuma za 2014.godinu i također da nam odgovori zašto nema šumsko-privredne osnove koja je istekla, a znamo da je urađena nova šumsko-gospodarska osnova i od strane kantonalne uprave za šume treba da dođe na saglasnost Vijeću. Ovako bi trebalo formulisati ove zaključke.

BESIM GLJIVA– vijećnik Stranke za Srednje

U većem dijelu što je načelnik rekao se slažem da se ovo razdvoji na dva zaključka, ali treba dodati i rok. Neka rok bude 30 dana.

Zamjenik predsjedavajućeg Mahir Dević je dao na glasanje predložene zaključke sa rokom od 45 dana.

OV-e je jednoglasno donijelo slijedeće

### ZAKLJUČKE

1. Predlaže se menadžmentu "Sarajevo-šume" da uslovi kupce drvnih sortimenata da ne vrše izvoz balvana kamionima sa prikolicama, teškim kamionima na dijelovima puta koji idu od Gajeva prema Dragoradima, Vrutcima, Vukasovićima i Gornjim Čevljanovićima ili da naprave međustovarište na Gajevima odakle bi kretao generalni transport trupaca, gdje bi dolazili kupci.  
Rok za realizaciju zaključka 45 dana.
2. Općinsko vijeće traži od Uprave za šume Kantona Sarajevo da preispita odobreni Plan gospodarenja za 2014.godinu sa aspekta realnosti utvrđenog etata i dostavi Općinskom vijeću svoj stav kao i odgovor zašto nije proslijeđena nova šumsko-privredna osnova na suglasnost Općinskom vijeću.  
Rok za realizaciju zaključka 45 dana.

Zamjenik predsjedavajućeg je naglasio da su predložena tri zaključka. Kolegica Marioneta je predložila zaključak vezano za izgradnju objekta Šehić Envera i dobila odgovor od načelnika da će kompletnu informaciju dostaviti na narednoj sjednici OV-a, a ne znam kako formulisati zaključak o kojem trebamo glasati.

U neformalnim diskusijama vijećnici su tražili informaciju vezano za objekat Šehić Envera.

SELVER HERIĆ – vijećnik SDP-a

Pozivam načelnika da pozove na odgovornost svoju pomoćnicu za urbanizam koja nije spremna ovom Vijeću dati odgovor o tako bitnoj stvari. To nije nešto od prije 10 godina, nego tražimo da nam danas odgovorite da vidimo u kakvom je stanju ta građevina, da li iziskuje obustavu ili nastavak gradnje kako bi se vijećnici mogli izjasniti o zaključku.

MELIHA AVDIBEGOVIĆ– pomoćnica načelnika za prostorno uređenje i stambeno-komunalne poslove

Dogradnja objekta zgrade A-1 je predviđena Regulacionim planom koji je usvojen. U fazi je izdavanje odobrenja za građenje. Znači, izdata je urbanistička saglasnost, a trenutno je faza odobravanja za građenje. Stanje na terenu mi nije poznato. Izaći će se na lice mjesta sa projektom za izvođenje i utvrditi stanje na terenu. Niko ne može početi sa izgradnjom ako nema odobrenje za građenje.

MUHAMED HANDŽIĆ – vijećnik BPS-a

Kad čovjek ovako sluša i gleda ovo sve svojim očima ne može da povjeruje. Onda se pitamo s kim mi ovdje imamo posla. Pitam se zbog čega sam ja ovdje i zbog čega se zovem dio zakonodavne vlasti u Općini Ilijaš. Mene je stid. Mene je stid što sam danas donio slike i moram vam uz pitanje dostavljati i slike objekata koji se grade u Banovcu u kojem i vi gospođo stanujete i svakodnevno prolazite pored tih objeta i ovo vidite. Ovo su djela vaših ruku. Na ovom se mora poraditi. Nikom mi nećemo skidati glave i rušiti. Mi nismo za rušenje, ali moramo naći pravni sistem i držati se pravnog sistema i u skladu sa tim postupati da se nešto gradi. Ovo o čemu vi pričate je nešto drugo. Ovaj objekat nadogradnje je u završnoj fazi. Da li ste vi ili niste izdali dokumentaciju potrebnu za njega mi nismo ni pitali, ali smo pitali za čvrsti betonski objekat gdje se rade kafanske pozornice. Takvih pozornica ćete u narednom periodu u Ilijašu imati na hiljade, a ako ne poduzmete mjere po ovom pitanju, ja sam jedan od tih koji će graditi kuću za stanovanje preko puta škole. Znači, vi se ništa ne pitate, dovoljan vam je samo idejni projekat i hajmo raditi. Tako to ne može. Dozvolite da se radi u skladu sa pravom i zakonom. Evo vam gospodo pomoćnici, načelnice i vijećnici slike koje ostavljam za govornicom da još jednom pogledate.

MAHIR DEVIĆ – zamjenik predsjedavajućeg

Dobili smo odgovor od pomoćnice načelnika i opciju da dobijemo kompletnu informaciju na narednoj sjednici. Kada dobijemo informaciju i vidimo šta se dešava, možemo poduzeti mjere. Sve ovo što sada pričamo su špekulacije.

MARIONETA ILIĆ JURETA – vijećnica SDP-a

Ja bih voljela kada bi smo bili ekspeditivniji na ovim sjednicama. Znači, ako imamo neke zaključke da ih odmah uradimo, a ne da se službe dopisuju jedna sa drugom.

Na prošloj sjednici sam pokrenula inicijativu da se izjasnimo u vidu zaključka, a odgovoreno mi je da ćemo to uraditi na ovoj sjednici. Radi se o tome da se od vijećničkih paušala izdvoje sredstva (cca 100 KM) i da mi kao vijećnici uradimo autobuske nadstrešnice u svim mjesnim zajednicama. Moramo tačno informisati stanovništvo šta radimo, a ne samo da se dopisujemo

MAHIR DEVIĆ – zamjenik predsjedavajućeg

Očito je da pojedinci ne razumiju dobro šta je inicijativa, zaključak i sve ostalo, a što je u skladu sa Poslovníkom OV-a. Ja vaše široke priče neću pretvarati u zaključke. To je vaša dužnost. Zaključak treba da ima svoj početak i svoj kraj i da bude u skladu sa Poslovníkom. Ovdje su predložena četiri zaključka i niti jedan nije u skladu sa Poslovníkom OV-a. Dajem pauzu od 15 minuta i nastavite sa predsjedavajućim u formulaciji vaših zaključaka.

DAMIR FILIPOVIĆ – predsjedavajući

Preformulisao sam zaključke koji su pristigli i uz suglasnost sa onima koji su ih predložili. Vijećnik Alan Šerak je predložio slijedeći zaključak:

1. Zadužuju se nadležne službe da pripreme nacрте prijedloga izmjena i dopuna već postojećih akata u odluci o finansiranju parlamentarnih grupa u Općinskom vijeću Ilijaš. Brisati stav 2. člana 5. navedene odluke kojom je odobreno finansiranje vijećnika, koje su napustili parlamentarne grupe, koje su osvojile mandate na izborima, a koje se spriječava da na ovaj način ostvaruju prihode iz budžeta.
2. U članu 38. Poslovnika o radu općinskog vijeća u stavu 4. napraviti slijedeće korekcije: umjesto što stoji da vijećnik može biti najviše dva stalna radna tijela OV-a, treba da stoji: može biti član u dva radna tijela OV-a, s tim da da svoj rad u stalnim radnim tijelima ne ostavruje pravo na naknadu.

MAHIR DEVIĆ – Zamjenik predsjedavajućeg

Upozoravam organ OV-e na Poslovnik Općinskog vijeća Ilijaš. U tom poslovniku u jednom od članova piše ko može biti predlagač određenog akta ili odluke i ko može predložiti izmjenu ili dopunu tog akta ili odluke. To može, dakle, uraditi svaki vijećnik OV-a, to može da bude načelnik općine Ilijaš, to može da bude čak i član određene komisije, jer je formiralo OV-e, jer je ona produžena ruka ovog organa. Ako neko od kolega želi da mijenja akte, kao što je akt o finansiranju parlamentarnih stranaka u Općinskom vijeću, onda on to treba da uradi sam, ne možemo mi naložiti nadležnoj službi. Pripremiti izmjenu ovog člana, poslati prema kolegiju, a kolegij naravno, neće imati ništa protiv da to bude tačka dnevnog reda, niti treba da skida bilo koju tačku sa dnevnog reda. U ovom slučaju, bilo koji vijećnik predloži to i to, pošalje papire na kolegiju, te tu izmjenu koju on traži u tome, jer ovdje se radi o izmjeni i dopuni odluke a ne o nacrtu, a nacrt je posve druga forma dokumenta. Takva je ista stvar kada je u pitanju Poslovnik OV-a, čini mi se da se u toj izmjeni predlaže da se vijećnicima ne plaćaju rad u komisijama. Prema tome, opet isti akt, prijedlog, izmjene i dopune Poslovnika OV-a Ilijaš, isti predlagač, čovjek ili klub vijećnika. Ne možemo mi zadužiti nadležnu službu po inicijativi pojedinca. Vi to pripremite na narednu sjednicu kolegija, mi to stavimo. Ja više neću zaista objašnjavati ove akte tipa poslovnika, svaka od sad inicijativa, zaključak koja ne bude u skladu sa Poslovnikom, nećemo više podržati i naravno nećemo ni pomagati prilikom preformulisanja toga, jer nas ne shvatite dobronamjerno. Ako takav zaključak predate koji nije u skladu sa Poslovnikom mi ga nećemo podržati.

ALAN ŠERAK ( replika ) - Vijećnik SDP

Sve ove stvari koje ste vi uvaženi kolega Deviću sada rekli su apsolutno neutemeljene, po mom ličnom mišljenju. S tim u vezi, tražiću autentično tumačenje određenih članova Poslovnika OV-a i Statuta, i želim da mi se na idućoj sjednici na ovo sve odgovori. Ovo što vi sada govorite da nećete glasati zato što to nije u skladu sa Poslovnikom ili određenim drugima aktima OV-a, ne mogu da vjerujem. Nećete glasati iz jednog jedinog razloga, a zna se koji, jer nastavljate politiku svog bivšeg premijera u Skupštini KS, i kupujete većinu određenim stvarima, te nekim ljudima dajete više nego što treba, čisto samo da budu dio te parlamentarne većine. To je prava istina, ono što mi ovdje svi znamo. To što govorite ovdje, da ja kao vijećnik, ne mogu podnijeti inicijativu prema jednoj od nadležnih službi u općini Ilijaš je također apsolutno neutemeljeno. Evo postavljam sad pitanje, kako smo izglasali Program sanacionih mjera, jedan dokument, dali ovlaštenje načelniku da izmijenja sve pojedinačne odluke, koje ste tretirali tada, taj način finansiranja? Kako? Dakle, možemo !

MAHIR DEVIĆ ( replika ) - Zamjenik predsjedavajućeg

Naravno da možemo miješati kruške i jabuke, i to vi upravo radite. Vi ste upravo sad rekli to šta radite. Načelnik je bio predlagač akta koji se zvao Plan i program ušteda mjera. Ja vam samo kažem neka Alan Šerak bude predlagač izmjena Poslovnika i Odluke o finansiranju.

ALAN ŠERAK ( replika ) - Vijećnik SDP

Ovo je ona retorika ili moć ubjeđivanja koja je bila na prošloj sjednici gdje ste sa kolegom Besimom raspravljali o nekim amandmanima i neamandmanima, vodili ste polemiku, gdje je po meni Besim Gljiva bio potpuno upravu, isti taj Poslovnik o kojem vi govorite, ali je ovo isti slučaj, dozvoljava Besimu Gljivi da milion i 150 hiljada amandmana na prijedlog odluke stavi, to mu dozvoljava Poslovnik. Sada, što mi mijenjamo bit određenih odluka, to su druge stvari. Ja i dalje smatram da sam ja upravu, inicijativa prema nadležnoj službi ide, pa ćemo vidjeti šta će biti.

DAMIR FILIPOVIĆ – Predsjedavajući

Dao je na glasanje prijedlog zaključka Alana Šeraka.

Vijećnik Selver Herić je izrazio sumnju u glasanje i zatražio pojedinačno glasanje.

ZA su glasali slijedeći vijećnici: Alan Šerak, Marioneta Ilić-Jureta, Damir Filipović, Selver Herić, Adem Efendić, Nijaz Mašić, Sead Šehić, Akif Bešlija, Nijaz Rastoder, Muhamed Handžić.

PROTIV su bili slijedeći vijećnici: Mahir Dević, Nedim Matoruga, Saudin Durmić, Halid Dizdarević, Amar Dovadžija, Muamer Dervišević, Fahir Hasanović, Rasim Šehić, Selma Pušina, Edhem Hasanović, Asim Mujić, Nihad Bučuk, Enes Dizdarević.

UZDRŽANI su bili slijedeći vijećnici: Besim Gljiva, Aida Mališević.

Konstatovano je da sa 10 glasova ZA , 13 PROTIV i 2 UZDRŽANA, zaključak nije dobio potrebnu većinu.

Predsjedavajući je pročitao zaključak vijećnice Marionete Ilić-Jureta, te je OV-e sa 23 glasa ZA i 2 UZDRŽANA donijelo slijedeći

### ZAKLJUČAK

Da nadležna služba izvrši kontrolu izgradnje objekta i ako je u skladu sa zakonom da nastavi izgradnju, u protivnom da obustavi istu i dovede u red prvobitno stanje.

Konstatovano je da je zaključak dobio potrebnu većinu sa 23 glasa ZA i 2 UZDRŽANA.

Adem Efendić – vezano za odgovor načelnika da mjesna zajednica riješi imovinsko-pravne odnose kada su u pitanju autobuska stajališta, želim reći da u Pravilniku o izradi i upotrebi autobuskih stajališta stoji da općina i nadležna direkcija za ceste, a u ovom slučaju Direkcija za ceste Kantona Sarajevo, utvrđuju lokaciju za izradu i upotrebu autobuskih stajališta, zatim podnose inicijativu za izradu i upotrebu autobuskih stajališta nadležnoj direkciji, koja će je nakon toga uvrstiti u svoje planove. Ja bih volio da ovo zajednički rješavamo, kako se ne bi dopisivali.

## AD-2

### Izveštaj o realizaciji zaključka sa 16 sjednice OV-a

Diskutanata po ovoj tački dnevnog reda nije bilo, pa je OV-e jednoglasno usvojilo

### Izveštaj o realizaciji zaključka sa 16 sjednice OV-a

## AD-3

### Izveštaj o izvršenju Budžeta općine Ilijaš za period 01.01.-31.12.2013.godine

AKIF FAZLIĆ- Načelnik

Kao što ste vidjeli, budžet je izvršen u iznosu od 8. 552.670 konvertibilnih maraka ili 84% od plana, što smatram zadovoljavajućim. Izvršenje budžeta je ove godine, u odnosu na 2012. godinu, 32% posto veće. Što se prihoda tiče, oni su ostvareni u nešto manjem iznosu, i to 7. 617.000 konvertibilnih maraka ili 75%, odnosno 7% više u odnosu na 2012. godinu. Uzmemo li se u obzir svi faktori, evidentno je da je u 2013. godini zabilježen trend rasta prihoda, i to, što je vrlo bitno, prije svega vlastitih prihoda. Ono što su naši vlastiti prihodi, to je porez na imovinu, 762 hiljade ili 39% više od 2012. godine, indirektni porezi, 205 593 ili 7% od 2012.godine. Svi indirektni prihodi koji se dijele sa jedinstvenog računa BiH prema federaciji, kantonima, općinama rapidno padaju zbog rasta vanjskog zaduženja koja ima ova država, odnosno, dva entiteta, i zbog toga što se smanjuje osnovica za raspodjelu indirektnih prihoda i direktno utiče i na općinske indirektno prihode i na indirektno prihode KS. Kad su u pitanju neporezni prihodi 1.413.000 ili 45% nego u 2012.godini. Komunalne takse 158 hiljada, šume 94 hiljade, upotreba cesta koja je vezana za registraciju auta 94 hiljade, usluge katastra 52 hiljade, rente 784 hiljade ili 20% u odnosu na 2012.godinu. Kada su u pitanju tekući grantovi, želim napomenuti da smo ostvarili grant od Kantona u iznosu od 2. 351.000 ili za 12% manje, dakle, za našu općinu je bio manji tekući grant nego 2012. godine. Prema federalnom budžetu smo uspjeli ostvariti 220 hiljada ili 3.674% , pošto takvih ostvarenja nije bilo raniji godina. Kada su u pitanju kapitalni grantovi, od KS 1. 890.000 ili 24% više, od Općine Centar i Općine Ilidža smo dobili po 20 hiljada, odnosno, 40 hiljada u budžetu 2013.godine, i općina Novo Sarajevo, također nam je dala 10 hiljada ali je to već ušlo u budžet za 2014.godinu. I od donacija 36 hiljada, a ove donacije se odnose na uplate građana na učešće u rekonstrukciji, odnosno, asfaltiranju cesta. Kada su u pitanju kapitalni primitci ostvareno je 663 hiljade ili 51% više u odnosu na prethodnu godinu, odnosno, od prodaje zemljišta 544 hiljade i od prodaje poslovnih prostora 119. 217 KM. Kada su u pitanju rashodi 8.552.000. KM, u strukturu tih rashoda učestvovala su bruto plate i naknade sa 1.555.000 ili 13% više u odnosu na prethodnu godinu, odnosno, same bruto plate 1.319.960 ili 16% više u odnosu na prethodnu godinu, znači imali smo rast plata za 16%. Izdaci za materijal i usluge 759 hiljada ili 7% više nego što je to bilo u 2012.godine. Transferi tekući 2.265.000 i oni učestvuju nešto više od četvrtine ovog budžeta, sa 26.5% , tako da ovi tekući transferi su 53.6% ukupnog budžeta. Kapitalni grantovi, kapitalni izdatci 46.4%, ili nešto više od 4 miliona KM je dato za kapitalne potrebe. Kada su u pitanju tekući transferi drugih nivoa vlasti 57 hiljada, tu najvišu poziciju ima KSC sa 220 hiljada, a kada su u pitanju transferi prema pojedincima 1.079.000, odnosno, 9% više od prethodne godine, za sve vrste pomoći izdvojeno je 4 hiljade, za stipendije 21 hiljada, za saniranje elementarnih nepogoda izdvojeno je 96 hiljada, prevoz učenika 580 hiljada. Za neprofitne organizacije, sportska društva, ratna udruženja i druge 414.291 KM, te subvencije poljoprivrednicima

223 hiljade. Na bazi ovih prihoda i rashoda ostvaren je deficit od 935.522 KM. S obzirom da je veliki deficit nabrojaću samo neke od uslova:

1. Provođenje računovodstvenih standarda, a vezano za kredit, za pješačku zonu,
2. Kanton Sarajevo nije uplatilo sva sredstva za projekte iz 2013.godine, koje smo mi realizirali iz kantonalnog budžeta,
3. Stavka vezana za porez prometa nepokretnosti objekata fabrike "Udobnost".

Suštinski gledano, ovaj naš deficit se kreće između 300 i 400 hiljada KM, te ono što je bilo planirano u budžetu, 84% zadataka smo izvršili, budžet je jako bio ambiciozan, te na zavidnom nivou izvršen.

Predsjedavajući je dao na glasanje treću tačku dnevnog reda.

Konstatovano je da je sa 20 glasova ZA, 4 PROTIV i 1 UZDRŽAN usvojen

Izveštaj o izvršenju Budžeta općine Ilijaš za period 01.01.-31.12.2013.godine

AD-4

Izveštaj o radu i finansijskom poslovanju za 2013.godinu Javne ustanove "Kulturno-sportski centar i Radio Ilijaš" za 2014.godinu

BENIS FAZLIĆ – Direktor "Kulturno-sportskog centra i Radio Ilijaš"

Godina 2013. je s aspekta poslovanja ustanove bila teška, ali smo u svim segmentima nastojali da se što više približimo građanima općine Ilijaš, odnosno našim konzumentima. Moram naglasiti da se uvijek može više. U izvještajnom dijelu vidjete ćete čime ja nisam zadovoljan, svake godine umanjujemo sredstva za nabavku knjiga. Što se tiče sportskog segmenta, dajući podršku, dobili smo dva premijer ligaša. Što se tiče radijskog programa, odnosno informativnog, prvo ja mogu reći, da od svih ovih segmenata, ovim sam najmanje zadovoljan, ali ćemo u narednom periodu nastojati da taj segmenat dignemo na jedan veći nivo. Ustanova, u odnosu na broj zaposlenih, je poslovala sa istim brojem, da smo uz pomoć Zavoda za zapošljavanje primili određni broj pripravnika, da smo uz pomoć općine Ilijaš primili određne broj volontera. U finansijskom izvještaju sam namjerno ostavio usporedu 2011.godinu sa 2012. i 2013.godinom, a iz tog izvještaja se može vidjeti i stalni pad prihoda, kako budžetskih tako i vlastitih. U ovoj godini ćemo nastojati povećati ove vlastite prihode, što nisam siguran kada su u pitanju budžetski. Što se tiče rashodnog dijela, tu nismo nikako zadovoljni, jer nismo uspjeli isplatiti ni plate, niti regres, niti topli obrok. A na kraju ovog finansijskog dijela, možemo reći da je ova ustanova poslovala uspješno, jer smo dobili veliki broj zahvalnica i pohvala za ono što smo radili.

ALAN ŠERAK – Vijećnik SDP-a

Sugerisao bih predsjedavajućem da povede računa o ovima koji dobacuju. Bitno je da je naša ustanova KSC poslovala pozitivno, ali i to je relativno, gledajući kako ga ko posmatra. Šta se kod vas podrazumijeva pozitivno poslovanje uvaženi direktore? To da nam na jednoj strani prikažete prihode u ovoj ustanovi, a u rashodima navedete one stvari koje ste plaćali, i to tako diktirate da vam ostane 300 KM na kraju godine, i kažete da ste poslovali pozitivno sa 300 KM na kraju godine. Kažite mi kako? Interesantno je da smo na kraju svake godine pozitivni, a prema mom saznanju samo jednom dobavljaču imamo obaveza u iznosu 122 hiljade KM, radi se o Toplanama. Tu je sporno nekih 80 hiljada KM, proistekli iz obaveza koji je vama nametnuo mesdžid koji je bio sastavni dio KSC. Na moje dalje insistiranje, ili nekoj vrsti istraživanja, stoji da ste vi i dalje obavezni da to platite.

Interesantno je da ste prošlu godinu poslovali pozitivno, a da ste upravljačkim strukturama ostali uskraćeni 5.760 KM, drugom dobavljaču 1.600 KM, i to je ono što sam ja uspio saznati. Situacija kada je u pitanju ova Ustanova po meni je vrlo ozbiljna. Tražim da mi za iduću sjednicu dostavite potpuni dug ustanove, kome i koliko imate dužni? Imate veliki dug, dajete raznim sportskim udruženjima, pa čak i Policijskoj upravi da besplatno koriste termine. Izvještajni period po pitanju rada same Ustanove aposlutno ne mogu da budem zadovoljan. Imamo dvoranu u kojoj ne radi grijanje, čak šta više, ljudi iz okolnih mjesta zbijaju šale na taj račun kako imamo lijepu dvoranu a nemamo grijanje. U zimskom periodu ne mogu se održati razne rekreativne aktivnosti. Stanje samog objekta je u nekoj dotrajaloj fazi, pa sam i sam pokušavao zajedno sa vama ovaj objekat revitalizirati, ali nažalost ne možemo, jer se mi u narednih nekoliko godina moramo samo baviti dugovanjima, a kamoli nešto investirati. Cjelokupno finansijsko stanje se svodi na to koliko ću ja od gospodina načelnika Akifa izmoljati sredstava da to prebaci, i da to imam za platu, a kada trebamo nešto krenuti raditi onda to nismo u stanju. Imamo poslovne objekte u centru Ilijaša, itekako atraktivno mjesto, a nismo u stanju da ga iznajmimo i kada na sve to dodamo slušanost radio Ilijaša, odnosno, neslušanost, ja smatram da ta Ustanova, po mom ličnom mišljenju nije odgovorila svrsi od prošle godine. Ovdje ću izjaviti da mi nećemo glasati za ovaj izvještaj, s tim da bih pohvalio službu marketinga, koja je prebacila plan od prošle godine koji je imala zacrtan.

**BENIS FAZLIĆ – Direktor “Kulturno-sportskog centra i Radio Ilijaš”**

Kažem da ova konstatacija kada su u pitanju dugovanja ne stoji. Činjenica je da je izlaskom Islamske zajednice, odnosno džematskog odbora ostalo 88.000 KM dugovanja, i da su Toplane knjižile taj dio duga pod ovu Ustanovu, ali da smo mi u sudskom sporu sa Toplanama dokazali da mi nismo prouzrokovali taj dug jer smo imali punovažeći ugovor sa Islamskom zajednicom i taj dio duga je izknjižen iz Ustanove KSC i Radio Ilijaš. Drugi dio duga od 43.000 KM odnosi se na aščinicu, i taj dug je bio knjižen na Ustanovu, i mi smo i taj dio duga sa Toplanama u sudskom postupku riješili. U ovom trenutku KSC i Radio Ilijaš, Toplanama duguje 17.000 KM. Morate znati da 22.000 KM Kanton po osnovu biblioteke, osnovne i srednje muzičke škole duguje Ustanovi KSC i Radio Ilijaš. Ja odgovorno tvrdim i stojim iza ovog poslovnog rezultata. Po odluci prethodnog načelnika, ja imam odobrenje da Policijska uprava u sklopu redovnih aktivnosti koristi dvoranu jednom sedmično po 75 minuta.

**ALAN ŠERAK – Vijećnik SDP-a**

Prema ovome što ste nabrojali, mesdžid i aščinica vam zatvaraju dug prema Toplanama. Dobio sam podatak da dugujete 122 hiljade KM, od toga vi kao poslodavac dugujete 17 hiljada KM prema Toplanama, 14 hiljada KM u prošloj godini, neke druge dobavljače vam neću ni navoditi. Ali da razjasnimo situaciju, dostavite nam, molim vas, ukupne dugove prema svim dobavljačima koje imate. Upravni odbor daje pozitivno mišljenje, razgovarao sam sa tim ljudima, gdje mi čovjek priča o nečemu u šta ni on sam ne vjeruje. Što je više apsurdno nadzorni odbor nam također daje neko pozitivno mišljenje. Po meni, neke stvari bi se trebale desiti, ti ljudi koji odlučuju neka i dalje odlučuju, i na kraju šta se desi sa tom Ustanovom biće kriva samo jedna gupacija ljudi.

**MAHIR DEVIĆ – Zamjenik predsjedavajućeg**

Mi ćemo pohvaliti izvještaj Ustanove KSC i Radio Ilijaš, posebno smo zadovoljni sa dijelom



koji se zove radijski program, također, sa objektivnošću izvještavanja, poznanstvom sa određenim političkim subjektima itd. Šalu na stranu. Ja ne mislim da je ova Ustanova u ovoj situaciji o kakvoj su govorili prethodnici. Naravno da ima tu puno posla da se uradi. Mi kao općinsko vijeće treba da sugeriramo i menadžmentu i direktoru da se neka pitanja u toj ustanovi trebaju riješiti na adekvatan način. Ovdje prije svega mislim na radijski program, na objektivno izvještavanje, na slušanost tog programa i konačno, siguran sam da kvalitet tog programa direktno utiče na pad prihoda. Direktor zajedno sa menadžmentom treba da poradi na slušanosti tog programa. Neki pojedinci su očigledno privatizirali tu vrstu programa, i mi, nažalost, danas imamo više informacija preko RTV Vogošća, za daleko manja sredstva koja izdvajamo, o svim aktivnostima koje se dešavaju u Ilijašu. Nije normalno da u Ilijašu bude investirano više od 4 miliona KM u kapitalne projekte, a ono što smo mi mogli pročitati od uređivačke politike ovog medija, jeste da je ovdje sve crno. Za ovih šest godina, koliko sam ja u ovom općinskom vijeću, ja nisam pročitao čestit članak koji je trebao da bude zbog ovog čovjeka koji se zove načelnik općine, koji zaista vrijedno radi. Ovo ne govorim stranački već zbog općine Ilijaš. Mislim da se menadžmentu treba naložiti nekoliko stvari. Prije svega, da menadžment mora povećati plan vlastitih prihoda, da mora u 2014. godini ubrati više prihoda nego u protekloj, upravni odbor zajedno sa menadžmentom mora iznaći tehničko rješenje za zagrijavanje sportske dvorane, da se ta priča već jednom završi. Jesu li to Toplane, je li to Sarajevo-gas, da li gradnja novog objekta naše lične Toplane koja treba to da grije. Mislim da ova Ustanova zrela da se u njoj uradi neka ozbiljna sistematizacija radnih mjesta, u smislu ušteta, u smislu pozicioniranja i da svi oni koji tamo primaju platu i zarade. Uz ove sugestije klub SDA će podržati ovaj izvještaj, ali provjerićemo ovo na slijedećem izvještaju o ovih nekoliko stvari koje sam ja nabrojao. Vrijeme je da vidimo kako ćemo dalje sa bibliotekom, da li da ona pripadne JU Biblioteke Sarajevo, pa da se na taj način oslobodimo plaćanja za jednog uposlenika. Mi smo nekada tu biblioteku ostavili u sklopu KSC-a, i ona je određeno finansijsko opterećenje. Da li je došlo vrijeme da biblioteku pripojimo toj JU, i to neka nam odgovore menadžment i direktor, i uz ovih 4 – 5 stvari, stvar se može još popraviti. Ne mislim da je tu stanje crno, ali mislim da tu treba djelovati u toj godini kako ne bi otišlo u dalje probleme.

AKIF FAZLIĆ – Načelnik

Želio bih da raspravimo danas ovaj izvještaj, da nemamo više nikakvih dilema koje su nametnute u smislu je li ovaj izvještaj na korektan način urađen i dostavljen. Prvi i evidentni zaključak, ali također i problem je pad prihoda. Ako gledamo rashode, mi nemamo šta reći Ustanovi na potrošnju, od plata pa do svih materijalnih troškova. Racionalno su se ponašali, nisu pare trošene tamo gdje ne treba. Treba također, vidjeti i potraživanja, ova Ustanova nije mogla neke stvari naplatiti, a pogotovo je porazna činjenica da ih nije mogla naplatiti od Kantonalnog budžeta. Ono na šta trebamo više obratiti pažnju jeste funkcija ove Ustanove, i da ocijenimo jesmo li mi zadovoljni funkcijom koju ona vrši, a tamo je nekoliko funkcija, sportska dvorana, kultura, radio i biblioteka. Kada je u pitanju dvorana, moramo kazati da nismo zadovoljni obezbjeđenjem uslova za naše građane i sportiste kada je u pitanju grijanje. Moramo donijeti zaključak, da menadžment i direktor nađe sa stručnim licima šta je to adekvatno tehničko rješenje, i da se od slijedeće sezone ovo pitanje ne ponavlja. Što se tiče biblioteke, zaključak je da menadžment napravi analizu šta je to biblioteka pripojena KSC-u i šta je to biblioteka pripojena JU Biblioteke Sarajevo. Segmentom kulture mi trebamo biti najzadovoljniji, jer uz sve finansijske poteškoće, ova Ustanova se borila oko organizovanja bar nekoliko kulturnih manifestacija. Što se tiče radija, i kroz marketinško i kroz finansijsko stanje, to se

mora riješiti i kroz rad uređivačkog vijeća i kroz rad glavnog urednika. Ako radio neće ići uzlaznom putanjom, u smislu slušanosti, kvaliteta, objektivnosti onda ćemo ići u projekat privatizacije radija. Za ovaj nivo finansiranja koji mi dajemo, može se kupiti na tržištu puno povoljnija i kvalitetnija usluga, ali znamo da su tamo zaposleni ljudi. Alternativa ili bolja slušanost i kvalitet ili privatizacija. I to su neke stvari koje mi trebamo podržati i dati priliku menadžmentu da ih provede.

Predsjedavajući je zaključio raspravu te prvo dao na glasanje zaključke predložene od strane načelnika.

MAHIR DEVIĆ – Zamjenik predsjedavajućeg

Ja ću ponoviti zaključke:

1. Da menadžment zajedno sa direktorom napravi jasan elaborat vezano za stanje biblioteke u JU KSC, da li da ide prema JU Biblioteke Sarajevo ili da ostane sastavni dio KSC-a
2. Da se učini sve da se poveća vlastiti prihod
3. Restruktuiranje radijskog programa
4. Iznaženje tehničkog rješenja za grijanje sportske dvorane
5. Da se napravi elaborat vezano za ekonomsku opravdanost privatizacije radija

BESIM GLJIVA – Vijećnik Stranke za Srednje

Nije mi jasno šta se podrazumijeva pod restrukturiranjem radijskog programa? Ako znamo koje ljude imamo zaposlene, a po ovom izvještaju vidimo da je to 5 ljudi u radiju, i ako oni nisu adekvatni za svoj posao, ne mogu oni podići, povećati slušanost. Mi ne možemo dati direktoru nešto što se ne može izvesti sa strukturom koju ima. To su ljudi koji rade neki drugi posao tamo, i ne smatrate valjda da je restrukturiranje radia, ako radio hvali tamo neke određene ljude na vlasti, ja smatram da radio treba da bude kritičar i koji treba da kritikuje rad pa i kad je dobar. Tako da mi nije jasna ta restrukturacija radia.

MAHIR DEVIĆ ( replika ) - Zamjenik predsjedavajućeg

Ovdje je u pitanju uređivačka politika koja direktno utiče na pad prihoda. Mi ne tražimo nikakve kadrovske ni personalne stvari, mi tražimo da u okviru ovog radia se prave emisije koje se tiču ovog grada, koje će ljudi slušati, da ne čitamo neke šture izvještaje, kucane u kabinetima pojedinih političkih partija. Mi ne tražimo ovdje da radio podržava aktuelnu vlast, nas podržavaju naši projekti, ali ako u toj ustanovi imate za 5-6 godina, koliko sam ja ovdje vijećnik, da nije napisan čestit članak o aktivnostima koje provodi načelnik, ne politička partija, o aktivnostima provedene u mjesnoj zajednici od strane nekog predsjednika, tamo možete pročitati sivilo, crnilo. Mi ne tražimo da nas neko hvali, samo da nas objektivno izvještavate. Ako imate RTV Vogošća koja je snimila u protekloj godini i u ovoj desetini projekata, ako imate otvaranje stotine novih radnih mjesta, ako imate da se načelnik općine Ilijaš stavlja u ravan sa načelnikom Bijeljine, je li to nije vijest za radio Ilijaš? Ja mislim da jeste. Samo neka se objektivno informiše, ne treba glavni urednik i uređivačka politika da odlazi u političke partije, neka dođe u Službu društvenih djelatnosti i informisanje, pa neka im oni kažu šta je ovdje urađeno.

## NIJAZ RASTODER – Vijećnik LDS-a

Ne treba vršiti pritisak na uređivačku politiku radija, to je zaista povreda svih ljudskih prava, povreda profesionalnosti tih ljudi, da se vrši pritisak šta će oni pisati. To jeste neovisan radio, i oni objektivno pišu koliko misle da pišu, i mislio sam zaista da glasam za ovaj izvještaj, međutim sa ovim zaključcima koje je predložio kolega Dević, ja ne mogu podržati ovaj izvještaj.

## ADEM EFENDIĆ – Vijećnik SBB BIH ILIJAŠ

Ja ću u ime kluba SBB BIH reći da nam ne pada na pamet da glasamo za zaključke koji su sastavni dio izvještaja KSC i Radio Ilijaš. Direktor je podnio izvještaj, a ako ima nekih zaključaka što su iznosili ovi što su dobro do sad upravljali javnim preduzećem i jednim i drugim, neka to bude sastavni dio programa rada za narednu godinu, 2014.

## SELVER HERIĆ – Vijećnik SDP-a

Želim da vas obavijestim da SDP neće glasati za ovakve zaključke koji se odnose na uređivačku politiku, na sistematizaciju radnih mjesta, očito da se tu neke stvari pripremaju i mi ne želimo da, kako nevinim tako i onim drugim koji su se "ogriješili" o poslovnik o radu u Radio Ilijašu, učestvujemo u tome.

## MAHIR DEVIĆ – Zamjenik predsjedavajućeg

Ako je sve sjajno i ako su sporni ovi zaključci što se SDA tiče, mi odustajemo od zaključka, podržite izvještaj, mi nemamo ništa protiv.

Predsjedavajući je zaključio 4. tačku dnevnog reda i dao na glasanje.  
Mahir Dević je izrazio sumnju u glasanje i zatražio pojedinačno glasanje.

ZA su bili slijedeći vijećnici: Mahir Dević, Nedim Matoruga, Saudin Durmić, Halid Dizdarević, Amar Dovadžija, Muamer Dervišević, Fahir Hasanović, Rasim Šehić, Selma Pušina, Edhem Hasanović, Asim Mujić, Besim Glijiva, Nijaz Rastoder, Nihad Bučuk, Enes Dizdarević.

PROTIV su bili slijedeći vijećnici: Adem Efendić, Nijaz Mašić, Sead Šehić, Akif Bešlija.  
UZDRŽANI su bili slijedeći vijećnici: Alan Šerak, Marioneta Ilić-Jureta, Damir Filipović, Selver Herić, Muhamed Handžić.

Konstatovano je da sa 15 glasova ZA, 4 PROTIV i 5 UZDRŽANIH usvojen

Izvještaj o radu i finansijskom poslovanju za 2013.godinu Javne ustanove "Kulturno-sportski centar i Radio Ilijaš" za 2014.godinu

### AD-5

Prijedlog Odluke o davanju saglasnosti na Plan rada Javne ustanove "Kulturno-sportski centar i Radio Ilijaš" za 2014.godinu

Diskutanata po ovoj tački dnevnog reda nije bilo, pa je OV-e sa većinom glasova usvojilo

Odluku o davanju saglasnosti na Plan rada Javne ustanove "Kulturno-sportski centar i

Radio Ilijaš" za 2014.godinu.

AD-6

Prijedlog Odluke o provedbi Programa mjera i ušteda sa socijalnim programom za 2014.godinu, a shodno Odluci Općinskog vijeća Ilijaš o davanju saglasnosti na Program mjera i ušteda sa socijalni programom broj:01/1-02-511-5/14 od 27.02. 2014.godine

NIJAZ RASTODER – Vijećnik LDS-a

Općinski odbor LDS-a je razmatrao materijal i odlučio je da neće podržati ovu tačku dnevnog reda, iz prostog razloga što imamo u zadnjoj tački gdje će općina platiti 324 hiljade KM, i ta tačka nam ne dozvoljava da glasamo za ovo, jer ovdje imamo situaciju da treba oduzeti nečijoj djeci, pa drugoj nečijoj, s pravom, platiti užinu i dati nekom 100 KM, a zbog nehata ili već nečeg drugog, dajemo 324 000 KM nekom čovjeku zbog nekih sudskih odluka. Da se općina domaćinski odnosi ili da se vodila ta sredstva su se mogla usmjeriti na socijalna davanja, te zbog toga ne možemo podržati ovu tačku dnevnog reda.

MUHAMED HANDŽIĆ – Vijećnik BPS-a

U ovoj odluci u članu 3. mi nisu jasni kriteriji, piše da domaćinstvo broji najmanje 5 članova. Šta sa jednom staricom koja sama živi i nema primanja i treba joj pomoći, ali ako ne broji pet članova domaćinstva znači neće dobiti ovu pomoć. Da li je to kategoričan kriterij ili treba zadovoljavati jedan od ova dva kriterija.

SEAD ŠEHIĆ – vijećnik SBB-a

KV SBB-a predlaže slijedeći amandman:

Da se u članu 3. Odluke dodaju stavke:

- lica koja boluju od malignih oboljenja sa minimalnim primanjima
- lica sa teškim oboljenjima bubrega odnosno lica koja idu na hemodijalizu, sa minimalnim primanjima

Ako se ovaj amandman usvoji, mi ćemo glasati za ovu odluku.

ADEM EFENDIĆ – vijećnik SBB-a

Zamoliti ću sekretara OV-a odnosno predlagača ove odluke da mi objasni na koji pravni osnov se poziva ova odluka (neka mi pročita šta piše u članu 55. stav 1. tačka 4. Statuta Općine Ilijaš).

AKIF FAZLIĆ – općinski načelnik

Vezano za provedbu odluke, ako mislite na stavove sindikata, jasno i precizno je u odluci rečeno da se pozivaju sindikati. Nigdje nije apriori određeno. Stavovi sindikata nisu pozitivni, međutim, organ uprave i javna ustanova, i javno-komunalno preduzeće će na ovim budžetskim pozicijama smanjiti nivo sredstava i prestrukturirati ih na pozicije socijalnih potreba kako smo to programom rekli, a poslodavci i načelnik će izvršavati budžet kroz zakonski okvir da se ne naruši nešto što bi značilo pokretanje nekih stvari u smislu narušavanja zakonitosti ili nečijih prava. Tu nema bojaznosti, ali u provedbi odluke ide

prestrukturiranje, hoću li ja smanjiti broj uposlenih za jedan, ako se već sindikat i vodostan ne slažu da se smanji plata, ili ću neki drugi vid, ali masa para od 42.000 KM koliko je za organ uprave, odnosno 16800 KM koliko je za Vodostan i 6000 za KSC biće prebačeni na ovu poziciju, a odgovorni za izvršavanje svojih planova, odnosno budžeta, će ih tako realizirati. Tako da ova bojazan gospodine Rastoderu je, mislim, sada otklonjena i možeš glasati za ovu odluku.

Ovo što je gospodin Handžić pitao, mislim da je samo jedan od usluva, možda je detaljnije u trećoj alineji pojasniti, da ako ima primanja ili je petočlana porodica, i ima jednu osobu, znači da prolazi.

Podržavam prijedlog amandmana, s tim što bih zamolio predlagača da definiše nivo sredstava radi lakše provedbe odluke.

Pod minimalnim primanjima misli se na primanja koja ne prelaze 310,00 KM.

Diskutanata po ovoj tački dnevnog reda više nije bilo, pa je OV-e sa 22 glasa ZA i 2 UZDRŽANA donijelo

#### Odluku

o provedbi Programa mjera i ušteda sa socijalnim programom za 2014.godinu, a shodno Odluci Općinskog vijeća Ilijaš o davanju saglasnosti na Program mjera i ušteda sa socijalnim programom broj:01/1-02-511-5/14 od 27.02. 2014.godine

#### AD-7

Prijedlog Odluke o ustupanju prava korištenja nad zemljištem Udruženju Sportska akademija Ilijaš u svrhu izgradnje malonogometnog igrališta sa umjetnom travom

AKIF FAZLIĆ – općinski načelnik

Ideja ovog prijedloga jeste da bez trošenja budžetskih sredstava dođemo do još jednog sportskog objekta koji će biti na usluzi i sportistima i našim građanima po tipu kako je dat gradski stadion na korištenje NK Ilijaš, da se da ovo igralište na ustupanje Sportskoj akademiji Ilijaš. Vjerovatno u ovom periodu od pet godina, nećemo provesti regulacioni plan kojim je planiran parking prostor, tako da se kratkoročno ili srednjoročno u periodu od pet godina ovaj prostor od 900 m2 daje u svrhu izgradnje sportskog objekta, a on bi se gradio na osnovu nekog javno-privatnog partnerstva, da općina ustupi prostor bez naknade, a da Sportska akademija Ilijaš sama ili sa nekim izgradi ovaj sportski teren, da ga koristi, održava i da obezbjedi 25% slobodnih termina za građane besplatno.

Amandmani koji su dati od strane Nijaza Rastodera idu u skroz drugu suštinu i to je sasvim drugi koncept i druga odluka. Ovi amandmani idu u smjeru da izmijenimo i napravimo korekciju Regulacionog plana i objavimo konkurs na koji može konkurisati i neko drugi, a mi smo bliži ideji da to dobije naše udruženje koje dugi niz godina funkcioniše i ima rezultate, da se kroz taj projekat zaposli jedno lice od strane tog udruženja i da mi gazdujemo tim prostorom. Ovo je ideja pretočena u prijedlog kako doći do sportskog objekta, ako prihvatate možemo ići u realizaciju, ali ako nema saglasnosti Vijeća, i ako se želi na neki drugi način onda je to dugoročniji put, a i ja bih volio da mi izgradimo taj sportski objekat, ali mi nemamo tih sredstava i nisu planirana u budžetu.

ADEM EFENDIĆ – Vijećnik SBB-a

Mi smo u SBB-u protiv podjele i uništavanja društvene imovine, te smo tako i protiv ove odluke. Postavljam pitanje zašto nam ovu odluku predlaže Služba za društvene djelatnosti,

umjesto, po našem mišljenju, Služba za imovinsko-pravne poslove i zašto nije objavljen javni poziv ?

MUHAMED HANDŽIĆ – Vijećnik BPS-a

Drago mi je da smo dobili jedan akt gdje će se graditi sportska igrališta, a ne kafane. Podržat ću ovaj projekat, pogotovo što to nije fiksno, jer će se moći i premještati, a ako nekada bude nešto bitnije za ovaj grad od ovog igrališta, onda će se to i raditi.

NIJAZ RASTODER – Vijećnik LDS-a

Uložio sam amandman na ovu odluku, a jedino bih htio da se izvinim za obrazloženje koje nije takvo, ali moj amandman je gospodine načelnice bio usmjeren na to da ovo ima legalitet i legitimitet. I meni je drago da se gradi sportsko igralište, ali ovdje se ne poštuje Zakon o gradskom građevinskom zemljištu, bilo je potrebno objaviti javni konkurs.

Ovo zemljište je vjerovatno zemljište Osnovne škole "Hašim Spahić" i vjerovatno ćete nam suziti prostor za odmor i rekreaciju djece, ali možda će to biti dobro za djecu. Međutim, u odluci se nigdje ne spominje OŠ "Hašim Spahić" koja ima tako malu salu za sport i neuslovnu, a 25% termina dajete općini koja će to opet dati Sportskoj akademiji. Da ste bili korektni i tih 25% dali OŠ "Hašim Spahić" ja vjerovatno ne bih ni izlazio za govornicu.

Sjednicu dalje vodi zamjenik predsjedavajućeg Mahir Dević.

NIJAZ MAŠIĆ – vijećnik SBB-a

Postoje neki planovi kojima je predviđeno gdje se šta treba postaviti. Na Banovcu je planiran bazen i mislim da na lokalitetima izvan centra grada treba graditi ovakve vrste objekata. Mislim da je ovaj predloženi prostor pretijesan i da sužavamo prostor OŠ "Hašim Spahić". Ja bih predložio predlažaču da ovu tačku povuče sa dnevnog reda i da to predviti na drugoj lokaciji, jer svi objekti koji su nužni uz ovo igralište neće se moći graditi jer nema prostora.

BESIM GLJIVA – Vijećnik Stranke za Srednje

Mi iz Stranke za Srednje ćemo ovo podržati, jer mislim da sve što je dobro, na neki način treba da bude legalno. Ako ovo zadovoljava i minimum zakonskih uslova onda je dobra stvar. Ovdje ne treba politiku gurati i ovo je dobar projekat.

AKIF FAZLIĆ – Općinski načelnik

Ja zaista sve razumijem primjedbe i prijedloge i o tome smo i mi razmišljali i lično sam išao na taj prostor. Ono je trenutno neuređen prostor i kada se uredi on će uljepšati grad.

Razmišljanja i da se ovo napravi na nogometnom igralištu su postojala, ali omladini, ako hoćemo da im nešto više pružimo, je centar grada drag. Ovo igralište će od jutra do mraka biti puno i to je suština ove odluke i da se taj prostor uredi. Ovdje ima jedna vrsta improvizacije, ovo što neko pominje zakon o građevinskom zemljištu, ali onda nećemo doći do cilja, a ako želimo doći do cilja, moramo gledati na ovo kao privremeni objekat na određeni period dok se ovo zemljište ne privede namjeni. To je dilema koju vi trebate razriješiti.

Na zahtjev vijećnika Alana Šeraka uslijedila je pauza od pet minuta.

Nakon pauze, vijećnik Nijaz Rastoder je kazao da povlači svoj amandman i ulaže drugi amandman na član 3. gdje umjesto riječi "Općina Ilijaš" treba da stoji "Osnovna škola Hašim Spahić".

AKIF FAZLIĆ – Općinski načelnik

Amandman se ne može prihvatiti zato što se određuje ovaj sportski objekat samo za djecu koja idu u ovu škulu, a ne za djecu iz srednje škole, ne za djecu iz škole Podlugovi i ne i za našu omladinu. Smisao ovoga je da svi imaju pravo na slobodne termine. Ovdje imamo objektivnih kriterija da možemo 5% dati školi, a 20% građanima, ali ne znam da li se smijemo upustiti u ovakvu računicu, koliko bi objektivno to mogli postaviti. Ja ne vidim drugog izlaza iz ovog prijedloga amandmana.

SELVER HERIĆ – Vijećnik SDP-a

Klub SDP-a će podržati ovu odluku, a isključivim krivcem ćemo smatrati općinskog načelnika Akifa Fazlića ako se odluka ne sprovede onako kako smo se dogovorili. Javno ćemo ga prozvati ukoliko se ovo igralište uspostavi, a ne bude kako treba i bit ćemo prvi zagovornici da se to skloni.

Diskutanata po ovoj tački dnevnog reda više nije bilo, pa je zamjenik predsjedavajućeg dao na glasanje prijedlog amandmana Nijaza Rastodera.

Obzirom da je izjavljena sumnja u glasanje, zatraženo je pojedinačno glasanje.

ZA su bili slijedeći vijećnici: Alan Šerak, Damir Filipović, Selver Herić, Adem Efendić, Nijaz Mašić, Sead Šehić, Akif Bešlija i Nijaz Rastoder

PROTIV su bili slijedeći vijećnici: Mahir Dević, Nedim Matoruga, Saudin Durmić, Halid Dizdarević, Amar Dovadžija, Muamer Dervišević, Fahir Hasanović, Rasim Šehić, Selma Pušina, Edhem Hasanović, Asim Mujić, Nihad Bučuk i Enes Dizdarević

UZDRŽANI su bili slijedeći vijećnici: Marioneta Ilić-Jureta i Besim Gljiva

Konstatovano je da sa 8 glasova ZA, 13 PROTIV 2 UZDRŽANA amandman nije dobio potrebnu većinu glasova.

Odsutni vijećnici: Aida Mališević i Muhamed Handžić.

Zatim je zamjenik predsjedavajućeg dao na glasanje prijedlog odluke.

Obzirom da je izjavljena sumnja u glasanje, zatraženo je pojedinačno glasanje.

ZA su bili slijedeći vijećnici: Mahir Dević, Nedim Matoruga, Saudin Durmić, Halid Dizdarević, Amar Dovadžija, Muamer Dervišević, Fahir Hasanović, Rasim Šehić, Selma Pušina, Alan Šerak, Marioneta Ilić-Jureta, Damir Filipović, Selver Herić, Edhem Hasanović, Asim Mujić, Besim Gljiva, Nihad Bučuk i Enes Dizdarević

PROTIV su bili slijedeći vijećnici: Adem Efendić, Nijaz Mašić, Sead Šehić, Akif Bešlija,

UZDRŽAN je bio slijedeći vijećnik: Nijaz Rastoder

Odsutni vijećnici: Aida Mališević i Muhamed Handžić.

Konstatovano je da je sa 18 glasova ZA , 4 PROTIV i 1 UZDRŽANIM Općinsko vijeće donijelo

Odluku o ustupanju prava korištenja nad zemljištem Udruženju Sportska akademija Ilijaš u svrhu izgradnje malonogometnog igrališta sa umjetnom travom

Uslijedila je pauza (15:00 do 15:10h)

AD-8

Prijedlog Odluke o usvajanju "Plana upravljanja čvrstim otpadom za područje općine Ilijaš za period 2014-2019.godine"

SADIK ALIĆ – komunalni inspektor

Povod izrade općinskog plana upravljanja čvrstim otpadom je bilateralni sporazum potpisan između Vlade Švedske i Bosne i Hercegovine 30.06.2004.godine, a izmjenjen i dopunjen 2006.godine. Na sjednici održanoj dana 31. 12. 2013. godine Općinsko vijeće Ilijaš donijelo je Odluku o pristupanju izradi "Plana upravljanja čvrstim otpadom za područje općine Ilijaš za period 2014-2019. godine". Shodno odredbi člana 2. stav (2) te Odluke Općinski načelnik Ilijaš imenovao je Tim za izradu "Plana upravljanja čvrstim otpadom za područje općine Ilijaš za period 2014-2019. godine" koji je izradio taj Plan. Programom rada Općinskog vijeća Ilijaš za 2014. godinu nije planirano donošenje ove Odluke, ali je njeno donošenje potrebno radi pristupanja realizaciji Planom utvrđenih aktivnosti od strane nadležnih organa. Odredbom člana 1. Odluke utvrđeno je da se ovom Odlukom usvaja "Plan upravljanja čvrstim otpadom za područje Općine Ilijaš za period 2014-2019. godine". Odredbom člana 2. utvrđeno je praćenje implementacije "Plana upravljanja čvrstim otpadom za područje općine Ilijaš za period 2014-2019. godine" u svim njegovim segmentima, prema utvrđenoj dinamici i rokovima za realizaciju. Odredbom člana 3. u cilju realizacije planskih ciljeva, mjera, programa i projekata iz "Plana upravljanja čvrstim otpadom za područje općine Ilijaš za period 2014-2019. godine" predviđeno je imenovanje Radne grupe za provođenje "Plana upravljanja čvrstim otpadom za područje općine Ilijaš za period 2014-2019. godine". Odredbom člana 4. utvrđeno je da je "Plan upravljanja čvrstim otpadom za područje općine Ilijaš za period 2014-2019. godine" sastavni dio odluke.

ADEM EFENDIĆ – Vijećnik SBB-a

U ime KV SBB-a želim pohvaliti predlagača ove odluke i da mu čestitam na mukotrpnom radu i izradi, kako odluke, tako i projekta, za ove zelene otoke i nadam se neće imati sporova kada bude u pitanju implementacija same odluke.

ALAN ŠERAK – Vijećnik SDP-a

Iskoristiću priliku da se pridružim čestitkama uvaženog kolege Adema Efendića. Moram reći da sam ja bio član ove radne grupe, moja posao u cijeloj ovoj priči bio je uistinu minimalan, "Sizifovski posao" je odradio upravo gospodin Sadik Alić, i moram kazati sa svog aspekta da je dokument urađen kvalitetno. Predložiću uvaženom načelniku da uvaženog gospodina i nagradi na neki način. Nadam se da ćemo pristupiti malo više odgovornije, kada su u pitanju izdvajanja za komunalni sektor jer do sada po ovom segmentu i nismo baš bili aktivni, te se nadam da će nam određeni projekti koje imamo



namjeru aplicirati, proći i da to uspijemo riješiti.

MUAMER DERVIŠEVIĆ – Vijećnik SDA

Također čestitam radnoj grupi koja je učestvovala u izradi ovog plana za upravljanjem čvrstim otpadom, i u ime kluba SDA kažem da ćemo podržati ovaj plan.

Zamjenik predsjedavajućeg Mahir Dević je zaključio raspravu povodom 8. tačke, te je stavljena na glasanje.

Konstatovano je da je većinom glasova i jednim uzdržanim glasom OV-e donijelo

Odluku o usvajanju "Plana upravljanja čvrstim otpadom za područje općine Ilijaš za period 2014-2019.godine"

AD-9

Prijedlog Odluke o prestanku statusa nepokretnosti u općoj upotrebi  
(K.O. SP\_Podgora)

Diskutanata po ovoj tački dnevnog reda nije bilo, te je OV-e sa 17 glasova ZA i 4 PROTIV donijelo

Odluku o prestanku statusa nepokretnosti u općoj upotrebi  
(K.O. SP\_Podgora)

AD-10

Prijedlog Odluke o prestanku statusa nepokretnosti u općoj upotrebi  
(K.O. SP\_Donja Vogošća i K.O. SP\_Ljubnići)

Diskutanata po ovoj tački dnevnog reda nije bilo, te je OV-e jednoglasno donijelo

Odluku o prestanku statusa nepokretnosti u općoj upotrebi  
(K.O. SP\_Donja Vogošća i K.O. SP\_Ljubnići)

AD-11

Nacrt Odluke o privremenom korišćenju javnih površina na području općine Ilijaš

Diskutanata po ovoj tački dnevnog reda nije bilo, te je OV-e jednoglasno donijelo

## Z A K L J U Č A K

1. Utvrđuje se Nacrt Odluke o privremenom korištenju javnih površina na području Opštine Ilijaš i stavlja na javnu raspravu.
2. Javnu raspravu će organizovati Služba za prostorno uređenje i stambeno-komunalne poslove, trajat će 20 dana u vremenu od 28. 03. 2014. do 17. 04. 2014. godine, a organizovat će se u Mjesnim zajednicama u kojima se nalaze javne površine koje se mogu koristiti za namjene utvrđene Odlukom.
3. Prijedlozi, primjedbe, sugestije i mišljenja svih zainteresovanih subjekata i pojedinaca iz javne rasprave dostavljaju se Opštini Ilijaš, Službi za prostorno uređenje i stambeno komunalne poslove koja ih prikuplja i sređuje.
4. Služba za prostorno uređenje i stambeno komunalne poslove, kao obrađivač odluke,

dužna je nakon provedene javne rasprave da Opštinskom vijeću Ilijaš podnese izvještaj o rezultatima Javne rasprave koji sadrži primjedbe, prijedloge i mišljenja, kao i da obrazloži razloge zbog kojih pojedine primjedbe, prijedlozi i mišljenja nisu prihvaćeni i pripremi tekst Prijedloga Odluke.

AD-12

Prijedlog Kodeksa Etike izabраних званичника опćине Ilijaš

AKIF BEŠLIJA – Vijećnik SBB BIH ILIJAŠ

Etička komisija je na svojoj drugoj redovnoj sjednici je razmatrala kodeks izabраних вјећника опćине Ilijaš, taj kodeks je i prije postojao, ali je sada morao pretrpiti određene promjene, a rađen je na osnovu člana 55. Statuta općine Ilijaš, i člana 99. Poslovnika općinskog vijeća Ilijaš. Ovdje se navodi kako bi se trebali ponašati svi izabrani vijećnici općine Ilijaš, kako na sjednicama, tako i van sjednica. Uvrštene su i kaznene odredbe, koje će po prijavi komisija razmatrati. Ovaj kodeks je komisija jednoglasno usvojila i uputila na vijeće.

Zamjenik predsjedavajućeg je zaključio raspravu. Konstatovano je da OV-e jednoglasno usvojilo

Kodeks Etike izabраних званичника опćине Ilijaš

AD-13

Izvještaj o radu Pravobranilaštva Kantona Sarajevo za općinu Ilijaš za 2013.godinu

Diskutanata po ovoj tački dnevnog reda nije bilo, te je konstatovano da je usvojen

Izvještaj o radu Pravobranilaštva Kantona Sarajevo za općinu Ilijaš za 2013.godinu

Zatim je zamjenik predsjedavajućeg Mahir Dević zaključio 17. sjednicu OV-a u 15:30h.

Zapisničar:  
Maida Habibović, s.r.

PREDSJEDAVAJUĆI  
OPĆINSKOG VIJEĆA ILIJAŠ  
Damir Filipović, dipl.pravnik, s.r.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov\\_ilijas@bih.net.ba](mailto:ov_ilijas@bih.net.ba)

